



# COMUNU DE MARACALAGONIS

TZITADI METROPOLITANA DE CASTEDDU

**SETORI :** **Polizia Locali**  
**Responsàbili:** **Vacca Gino**

**ORDINANZA N.** **26**  
**in sa dii** **02/11/2020**

**OGETU:**

Regolamentatzoni interina de su tràvigu de veturas po traballus chi pertocant a s'arretza de is àcuas limpias in sa Bia Cocco Ortu

## SU RESPONSABILITÀ DE SU SERVÌTZIU

**BIA** sa PEC imbiada po parti de [lavoripubblici@pec.comune.maracalagonis.ca.it](mailto:lavoripubblici@pec.comune.maracalagonis.ca.it) in sa dii de su 28/10/2020 a is oras 13:47, firmada de s'Ing. Giovanni Manis, chi at imbiau a su Servìtziu de Politzia Locali e sa comunicatzioni de s'Impresa de Fraigaduras Èdilis "EDILNOVA S.A.S. de Marco Sollai & C.", cun sei in Vico I° Marconi n.10 - 09055 GERGEI (SU), impresa chi est fendi is traballus de aconciadura de is arrugas de aintru e interbènnidas in s'arretza fognària de is àguas lìmpias - obras aciuntas e de cumpridura, aundi si pedit sa bessidura de una Ordinàntzia po apariciari, in sa bia Cocco Ortu, unu proibimentu de si frimai po sa dii 02/11/2020 e finsas a s'acabu de is traballus;

**ARRECONNOTU**, intzaras, po arresonis de interessu pùblicu, s'apretu de apariciari unu proibimentu de abarrada temporàneu e dennegai a su tràvigu de veturas in sa bia Cocco Ortu cun sa tarea de permiti sa cumpridura de is traballus numenaus;

**BIU** s'artìculu 5, comma 3 de su Còdixi Nou de s'Arruga, aprovau cun Decretu Legisladori 30 de abrili 1992, n. 285 e mudàntzias sighidoras e aciuntas, sighendi su cali is provedimentus po sa regolamentatzioni de su tràvigu in s'arruga funt spratzinaus de is entis meris, atruesus de is òrganus cumpetentis a norma de is artìculus 6 e 7, cun ordinàntzias arrexonadas e fatas connosci a sa genti imperendi is sinnalis prescritus;

**BIU** su cuncordau apariciari de is artìculus: 6, comma 4 litera b) e comma 5 litera d); 7, comma 1 litera a) e comma 2 de su Còdixi Nou de s'Arruga, sighendi su cali su Sìndigu, cun ordinàntzia cosa sua, podit scioberai is cumandus, is proibimentus o is stringiduras de genia temporànea o permanenti po dònna arruga o tretu de cussa, o po unas categorias de impreadoris, po cussu chi pertocat a is apretus de sa circolatzioni p de is caraterìsticas struturalis de s'arruga;

**BIUS** is artt. 159 comma 1<sup>a</sup> litera d) e 215 de su Còdixi Nou de s'Arruga;

**BIU** su regulamentu de esecutzioni e de cumpridura de su Còdixi Nou de s'Arruga aprovau cun D.P.R. 16/12/1992 n. 495 e mudàntzias e aciuntas sighidoras;

**BIU** s'art. 107 de su D. Lgs. n. 267/2000 - Testu Ùnicu de is Leis apitzus de s'Ordinamentu de is entis Localis;

**ARREGORDADA** sa circolari de su Prefetu de Casteddu prot. n. 4863/Àrea II - REL de su 20/01/2006 chi amostat su poderiu de ordinàntzias chi pertocant a sa circolatzioni de arruga;

**ARRECONNOTA** sa legitimatzioni cosa sua po s'affilladura de custa ordinàntzia cunforma a s'art. 107 de su D. Lgs. n. 267/2000 - Testu Ùnicu de is Leis apitzus de s'Ordinamentu de is Entis Localis, cumentu responsàbili de su SETORI IV - POLITZIA LOCALI de su Comunu de Maracalagonis (CA) cunforma a su Decretu de su Sìndigu N.08 de su 15/07/2020;

## CUMANDAT

Po is arresonis numenadas in sa premissa, de is seti oras de mengianu finsas a is cinqu de meri (07:00 - 17:00) de sa dii 02 de donniasanti 2020 e finsas a s'acabu de is traballus, cussu chi est acrarau innoi asuta:

- **Interdizioni a su tràvigu de veturas e de genti de sa bia COCCO ORTU intre s'ingruxeri**

**cun sa bia Garibaldi e cussu cun sa bia A. Mereu.**

- **apariciadura de su PROIBIMENTU DE SI FRIMAI temporàneu cun pinnigadura forzada ambus duus is ladus de su tretu de arruga de sa bia COCCO ORTU intre s'ingruxeri cun sa bia Garibaldi e cussu cun sa bia A. Mereu.**

In su tretu de arruga de sa bia COCCO ORTU, imbordigau de is traballus de aconciadura de is arrigas de aintru e is interbènnidas apitzu de s'arretza fognària àcuas lìmpias, ant a èssiri postus in is 48 oras ainnantis is sinnalis prescritus de PROIBIMENTU DE ABARRADA movidoris (figura II 74 Art 120) acumpangiaus de unu pannellu aciungidori de "logu de pinnigadura forzada" (Modellu II 6/m Art.83)e de un'atru pannellu integradori chi amostat is numerus de custa ordinàntzia.

In is ingruxeris de sa bia COCCO ORTU cun is bias Garibaldi e A. Mereu ant a ponni is tressas stradalis po tancai su tretu de arruga aunsi no podint intrai is veturas e sa genti, cun apicadura in cussus logus e totu su sinnali stradali de PROIBIMENTU DE NCI PASSAI (Figura II 46 Art. 116).

Cunforma a s'art. 159 comma 1u lìtera d) de su D. Lgs. 30.04.1992 n.285 - Còdixi Nou de s'Arruga - is veturas de calisiat genia lassadas in logu proibiu in su tretu de arruga imbordigau me is traballus e chi funt unu strobu po cussus e totu, ant a èssiri pinnigaus de sa autoridadi.

Sa genti chi tenit sa vettura frima in s'abarrada proibida, ant a pigai sa smenda de dinai prevìdia de s'art. 7, su de 14 comma de su D.Lgs. 30.04.1992 n.285.

### **DISPONIT**

Chi su cuntènniu de custa ordinàntzia siat fata connosci a sa genti cun sa ponidura de sinnaletica stradali costumada e cunforma a cussus prevìdius de su Tìtulu II de su D.P.R. N. 495/92 (Regulamentu de esecuzioni e cumpridura de su Còdixi Nou de s'Arruga). In prus at a èssiri amostada a sa genti atruessu de sa publicatzioni in s'Albu Pretòriu online Comunali e in su giassu Internet istituzionali de s'Enti - [www.comune.maracalagonis.ca.it](http://www.comune.maracalagonis.ca.it).

S'Impresa Fraigaduras Èdilis "EDILNOVA S.A.S. de Marco Sollai & C." cun sedi in Vico I<sup>u</sup> Marconi, 10 - 09055 GERGEI (SU) còdixi fiscali e partita IVA 00853170918, e su direttori de is traballus, aturant is responsàbilis ùnicus siat po sa parti tzivili e siat po sa parti penali e siat a calisiat efetu, de is dannus chi s'in casu ma benessint ocasionaus a sa propiedadi pùblica o a atra genti, ocasionaus de cussu permìtiu cun custa ordinàntzia, aturendi intzaras custa Aministratzioni e su personali dipendenti de custa sarvaus po inteu e chene calisiat responsabilidadi, custu puru chena castiai a is scrucullus chi iant a podi èssiri fatus.

### **ENTREGAT**

A s'Impresa fraigaduras èdilis "EDILNOVA S.A.S. di Marco Sollai & C." cun sedi in Vico I<sup>u</sup> Marconi, 10 - 09055 GERGEI (SU) - còdixi fiscali e partita IVA 00853170918, sa cuncordadura e ponidura de sa sinnaletica chi serbit, aici cumentu amostau in custa ordinàntzia;

### **INCÀRRIGAT**

A is òrganus de Politzia Stradali, cunforma a s'art. 12 de su D. Lgs. n. 285 de su 30/04/1992 e mudàntzias sighidoras, de sa averiguadura de sa posta in menti de custa ordinàntzia e de sa cuntestatzioni sighidora de is infratzionis eventualis.

**DISPONIT IN PRUS** chi còpia de custa ordinàntzia bèngiat publicada in s'albu pretòriu Online de

s'Enti e imbiada;

- a s'Impresa "EDILNOVA S.A.S. di Marco Sollai & C." - GERGEI (SU) [impresaedilnova1989@postecert.it](mailto:impresaedilnova1989@postecert.it)
- a su Servìtziu Tènnicu Comunali - SEDI. [lavoripubblici@pec.comune.maracalagonis.ca.it](mailto:lavoripubblici@pec.comune.maracalagonis.ca.it)
- a sa Prefetura de CASTEDDU; [sicurezza.prefca@pec.interno.it](mailto:sicurezza.prefca@pec.interno.it)
- a su Cumandu Statzioni Carabineris de MARACALAGONIS (CA); [tca22254@pec.carabinieri.it](mailto:tca22254@pec.carabinieri.it).

### **ARRÈGULAS PO SU RECURSU**

Cunforma a s'art. 3 comma 4 de sa Lei 241/90 e s.m.i., cuntra de custa ordinàntzia, cunforma a sa Lei n. 1034/1971, chinisiat chi siat interessau at a podi fai recursu po incupetèntzia, po tropu poderiu o po violaduras de sa lei, aintru de 60 diis de sa publicatzioni e/o de sa notificatzioni a su Tribunali Aministrativu Regionali de Sardìnnia.

De atra manera, sceti po arresonis de legitimidadi, a su Presidenti de sa Repùblica aintru de 120 diis de sa publicatzioni. Po cussu chi pertocat a su cumandau de s'art. 37, comma 3 de su D. Lgs. n.285/1992, sempri in su trèmini de 60 diis de sa publicatzioni e/o notificatzioni, at a podi èssiri entregau su recursu, de chinisiat ndi tèngiat interessu a sa apicadura de sa sinnalètica, po cussu chi pertocat a sa genia de is sinnalis postus, a su Ministeru de is Infrastruturas e de is Tragus, sighendi su caminu previdiu de s'art. 74 de su D.P.R. N. 495/1992.

**FAIT SCIRI** chi cunforma a is inditaduras de su Cabu III de sa Lei 07/08/1990, n. 241 s'Ufìtziu Responsàbili de su procedimentu est su Cumandu de Politzia Locali aundi si podit castiai totus is àutus chi pertocant a custu procedimentu e in prus su responsàbili de su procedimentu est su Responsàbili de su Servìtziu de Politzia Locali de Maracalagonis.

### **SU RESPONSABILITÀ DE SU SERVÌTZIU**

#### **Polizia Locali**

F.au Istr. Dir. Cap. Gino Vacca